

Jasmin Medić

Univerzitet u Sarajevu – Institut za historiju



Univerzitet u Sarajevu – Institut za historiju

Podgaj 6

Predmet: Izdvojeno mišljenje o izboru kandidata na poziciju stručnog saradnika za modernu historiju u odnosu na Komisiju za izbor

Kao član komisije za izbor kandidata na poziciju stručnog saradnika za modernu historiju dostavljam svoje izdvojeno mišljenje u odnosu na druga dva člana iste komisije.

Na konkurs za stručnog saradnika za modernu historiju prijavilo se ukupno 12 kandidata. Komisija je ustanovila da četiri kandidata ne ispunjavaju osnovne uslove tražene konkursom zbog nedostavljene dokumentacije te je jednoglasno odlučila da osam kandidata budu pozvana na razgovor za posao. Nakon obavljenih razgovora te nekoliko sastanaka o izboru kandidata, komisija nije uspjela da jednoglasno izabere kandidata.

Stava sam da kandidatu Semiru Hambu treba dati prednost iz sljedećih razloga:

Kandidat Semir Hambo je, za razliku od ostalih kandidata koji su ušli u uži izbor, jedini sa akademskom titulom magistra historije (300 ECTS bodova). Drugi kandidati su u zvanju profesora ili bachelora historije. Mišljenja sam da se u ovome slučaju, mada se u konkursnoj proceduri tražio samo stupanj bachelora historije (180 ECTS bodova), kandidatu koji pored akademske titule bachelora historije ima i titulu magistra historije, treba dati prednost. Kandidat sa završenim drugim ciklusom studija ispunjava sve uslove da upiše treći ciklus (doktorski studij). Kandidat Semir Hambo prvi ciklus okončao je sa prosjekom ocjena 8,67. Drugi ciklus okončao je sa prosjekom ocjena 9,29. Iako je kandidat upisao naučni smjer – oblast srednji vijek na drugom ciklusu, Vijeće bi trebalo imati u vidu da su ostali kandidati koji su ušli u uži izbor tek pohađaju drugi ciklus na nastavničkom smjeru.

S obzirom da su na konkursu tražene pokazane naučnoistraživačke sposobnosti, kandidat Semir Hambo je uredno dostavio dva naučna članka i šest prikaza. Svi radovi kandidata

objavljeni su u referentnim naučnim časopisima i publikacijama (indeksiranim časopisima u relevantnim bazama podataka). Dva naučna članka objavljena su u časopisu *Pregled UNSA* i Zborniku radova „Žene u srednjovjekovnoj Bosni“, *Stanak*, Sarajevo. Od šest prikaza jedan je objavljen u inostranstvu - *Istorijski zapisi*, Podgorica, a pet u Bosni Hercegovini – *Prilozi Instituta za istoriju, Radovi Filozofskog fakulteta Univerziteta u Sarajevu, Bosna franciscana, Godišnjak*, BZK Preporod, Sarajevo. Drugi kandidati su također dostavljali radove, ali su oni objavljuvani u studentskim časopisima. Ukazujem na bitnost u vrednovanju radova objavljenih u nereferentnim studentskim i referentnim naučnim časopisima, te i zbog ovog uslova traženog konkursom smatram da prednost treba dati kandidatu Semiru Hambi.

Komisija je imala interni dogovor da se prednost da kandidatu koji poznaje najmanje jedan strani jezik. Kandidat Semir Hambo je, za razliku od drugih kandidata koji su ušli u uži izbor, dostavio uvjerenja o poznavanju engleskog i italijanskog jezika. Odlično poznavanje engleskog jezika (što je i naveo u svome CV), kandidat je pokazao i kada mu je predsjednik komisije dr. Muhamed Nametak u toku razgovora za posao postavio pitanje na engleskom jeziku, a kandidat dao odgovore na traženom jeziku. Pored toga, kandidat Semir Hambo iskazao je želju za bavljenjem historijskom demografijom u periodu Austrougarske uprave u Bosni i Hercegovine što je, smatram, prijeko potrebno Institutu za historiju. Kandidat je pokazao da je upoznat sa materijom što je pokazao i u toku cijelog razgovora. S ciljem da kandidati budu pred komisijom jednako tretirani, a u dogovoru sa druga dva člana komisije, svim kandidatima postavio sam pitanje o metodologiji korištenja arhivske građe Međunarodnog suda za bivšu Jugoslaviju (MKSJ). Kandidat je pokazao da je upoznat sa korištenjem spomenute građe što je jako bitno za proučavanje rata u Bosni i Hercegovini i bivšoj Jugoslaviji u periodu 1991-1995. Stava sam da kandidat ima sve predispozicije da se na doktorskom studiju, ukoliko Institut za historiju osjeti potrebu za takvim kadrom, specijalizira za historijsku demografiju ili istraživanje ratnih zločina u Bosni i Hercegovini u periodu od 1992. do 1995. godine. Napominjem da jedno ne isključuje drugo.

Kandidat Semir Hambo je u toku 2012. i 2013. godine bio uposlenik Instituta za istoriju kao pripravnik. Isti je dobio i pozitivnu preporuku od tadašnjeg direktora Instituta, prof. dr. Husnije Kamberovića u kojem su navedeni kvaliteti kandidata i potencijal za naučnoistraživački rad. Imajući u vidu da je preporuku napisao profesor koji na Filozofskom fakultetu Univerziteta u Sarajevu drži nastavu iz predmeta iz oblasti moderne historije Bosne i Hercegovine i Jugoistočne Evrope, smatram da se kandidatu Semiru Hambi i zbog dvije

navedene činjenice (pripravnički staž u Institutu i spomenuta preporuka) treba dati prednost u odnosu na druge kandidate.

Prema članovima 3. i 6. Zakona o pravim demobilisanih boraca i članova njihovih porodica Federacije Bosne i Hercegovine u kojima se navodi da prednost pri zapošljavanju imaju članovi porodica demobilisanih boraca (roditelji, supružnici i djeca demobilisanih boraca – član 3), smatram da se, u skladu sa ovim Zakonom prednost treba dati kandidatu Semiru Hambi koji je, za razliku od svih ostalih kandidata, dostavio dokumentaciju u kojoj se navodi da je sin demobilisanog borca Oružanih snaga Bosne i Hercegovine. Otac Semira Hambe bio je od kraja 1991. do početka 1996. godine pripadnik Patriotske lige i Armije Republike Bosne i Hercegovine. Mišljenja sam da se i iz moralnih razloga sinu demobilisanog borca treba dati prednost pri zapošljavanju. Institut za historiju bi ovim potezom pokazao da cijeni tekovine Odbrambeno-oslobodilačkog rata i izbjegao eventualnu tužbu na koju kandidat ima zakonsko pravo. Mislim da bi eventualna tužba bilo kojeg kandidata (pripadnika porodice šehida ili poginulog borca, ratnog vojnog invalida ili demobilisanog borca) imala jako negativne posljedice, ne samo za Institut, nego i za komisiju koja bi u ovome slučaju bila odgovorna za kršenje člana 17 Zakona o pravima demobilisanih boraca i članova njihovih porodica.

Zaključak: Zbog gore navedenih razloga, predlažem Vijeću Instituta za historiju da prednost da kandidatu Semiru Hambi.

Sarajevo, 22.03.2018.

Član Komisije za izbor u zvanje

mr. Jasmin Medić

